

Сарпинск районд өвс хадлгъна йовуд хашнъ

Мал-агърусиг цааранднь өскджд, теднăс гардг шим-шүүсиг элвджүлхин кергт малдан элвгър хот белддж авхмн. Сарпинск района колхозмудт болн совхозмудт олна малд элвгър хот белддж авх агъу ик эв-аргъ бӓәнӓ.

Эн джил өвс, силос белддж авхд цань уга дулан токтун өдрмүд зогсджана. Тегӓд ик үрӓл уга, олна малд хойр мал күрх хот белддж авч, маласн икӓр шим-шүүс гаргъдж авх керг йоста ик чинр зүүджӓнӓ.

Болв, района колхозмуд болн совхозмуд өвс хадлгъна кӓдлмш йир ик хашнъгар кеджӓнӓ. Эн район июнин 23 күртл 156678 гектар газрт өвс хаддж, эс гидж зурагъан 41,4 процент кӓцӓдж, хадсн өвснӓс 82095 гектарнь скирдлгддж, эс гидж 52 процент. Района цуг колхозмуд болн совхозмуд 77000 тонн өвс белддж авх зурата, терӓнӓсн ӓрӓ гидж 18450 тонн өвс белддж авсн бӓәнӓ.

Ильичин нертӓ, «Путь Ленина» колхозмуд өвс хадлгъан ик хашнъгар кеджӓнӓ. «Путь Ленина» колхоз (ахлачнь үр Клименко) өвс хадлгъна кӓдлмшт сӓн гардвр эс өгсн учрар, хадсн өвсиг дахн хурадж скирдлджӓхмн уга. Өвсн балкандан, ковнъгдан хатад, салкнд өгрӓд үрджӓнӓ. Эн колхоз 27247 гектар газрт өвс хадх бӓӓсми. Болв ода күртл зуг 4630 гектар хаддж, эс гидж зурагъан 16 процент кӓцӓдж.

Ильичин нертӓ колхоз (ахлачнь үр Плескачев), 23745 гектар өвс хадх зӓвтӓ, терӓнӓсн ӓрӓ гидж 5640 гектар хаддж, эс гидж зурагъан 23,4 процент кӓцӓв.

2-ч номертӓ совхоз (директорнь үр Павленко, парторганизацин сеглӓтрнь үр Гришков), 102370 гектар газрт өвс хадх зурата, терӓнӓсн 23180 гектар өвс хаддж, эс гидж зурагъан 22,6 процент кӓцӓв.

Колхозмудин болн совхозмудин гардачнр нидн джилнн түрү цагиг мартдждж оркдж. Малд элвгър хот эс белддж авсн учрар, нидн намр, үвл болн эн джилнн хавр малас ик гару гарсиг эдн мартад хуурцхадж.

Колхозмудин болн совхозмудин гардачнр, партийн организаци өвс хадлгъна, хуралгъна кӓдлмшт йовх механизатормудт, кӓдлмшчирт болн колхозникудт таслвр уга гардвр өгч, өвс хаддг, хурадг, мааджурддг цуг техникиг кӓцднн олзлдж, татг-тартг угагъар цаглянь хурадж авхмн. Тер

дотр өвс хуралгъиг хадлгънас ард хоцрулхмн биш. Тииглӓ хадсн өвсн балкдан болн ковнъгдан хатад, шимӓн геехн уга.

Района партийн организаци болн района советсин организацин церглӓчнриг өвс хадлгъна, хуралгъна кӓдлмшт шунмгъагъар орлцулдж, олна малд хойр джил күрх хот белддж авх керг эркн чинртӓ тӓр болджана.

Б. БОЛДЫРЕВ,

**КПСС-н тангъчин комитетин
селӓнӓ эдл-ахун отделин
инструктор.**